

# SCHNAPPLÜFTLI

E Infobleddli fir unseri Gönner

Uusgob 2/07



- Faasnachts-Rüggbligg
- Fötell Yyschällete
- Guetschyn fürs Nordtangänte-Fesch



Erschynigswyys: 2 x pro Joor  
Uflaag: 150 Exemplaar  
Drugg: Xerox Docu Color

Gstaltig und  
Redaggtion Roger Müller  
Adrässe: Roger Müller  
Römerstroos 32  
4153 Ryynach

oder [clauro@freemails.ch](mailto:clauro@freemails.ch)

Helge uf dr Titelsytte: E Bild vom Marti  
fyr d UBS als Faasnachtsinserat.

**Fir mi perseenlig isch die vergangene Faasnacht die sibzäänti Uusgoob gsii. An dr erschte Süscheé-Sitzig im Herbscht 1990 isch sogar mi Idee (d Fraue im Militäär) fir d Faasnacht 1991 als Süscheé gwäält worde.**

S Kriegsgschee im Noche-Oschte hänn ys denn aber bewooge, das Süscheé nid umsetze, obwool d Larve und s Goschdym scho gmacht gsii sinn. Stattdesse simmer im Pierrot gloffe und hänn e Sujet-Rüggbligig zaigt. Hit würde mir das sicher nümme mache – also ammel ych ganz sicher nid!

Wenn me mi froggt, was mir in de vergange Joor speziell in Erinnerung bliibe isch, so würd ich sicher die erscht Faasnacht erwääne. Statt als begaischerte Zueschauer am Strooserand, bini dört sälber ain vo däane gsii, wo mit Larve und Goschdym aggtif mitmacht. Au anderi „Müschterli“ könnt ych verzelle, so z.B. die „nimmersatte“ Stunde mit em Mull, im Glaibasel, wo aimool sogar bis am Donnschtig am vieri (Nomidaagl) gange sinn.

Ansunschte bliibe mir in Gloobo aifach die tolle Stund mit mine Frinde vo dr Clique im Kopf. Mir hänn aifach immer guet mitenand und das isch fir mi s Wichtigschte.

S kommende Joor isch für d Luft-schnapperli denn aber ganz e bsunders. Mir hänn nämmlig Jubiläum: 25 Joor. Fir die Mitglieder, wo syt 1983 drbyy sinn (Sandra Müller, Jacqueline, Esthi, Ruthli, Werni, Marco und Mull) also e ganz e spezielli Faasnacht!

Das Jubeljoor, soll aber nid nur an dr Faasnacht ganz speziell wärde, nay s ganz Joor söll e weeneli anderscht syy. S Jubel-Comité isch scho lenger draa, die Plaanig zmache. An dr letsche GV hänn si uns au scho e paar grundsätzligi Idee vorgestellt. Mir hänn däm OK denn an dr GV au s OK fir die wyteri (daylwyys ghaimi) Plaanig erdaylt. Au dir als Gönner derfet denn doo draa daylnää. Aber ebbe, es söll noonig zviil verroote wäärd. Löönt eych yberrasche!

An däare Stell mecht ych jetzt no kurz Wärbig mache. Nämmlig fir s Wucheänd vom **8. bis 10. Juni. Denn findet s Nordtangänte-Feschcht statt.** Mir hänn dört e Baiz (wie immer Raclette!) und würde uns enorm freye, wenn mir meeglisch viil Gönner und Frinde derfe bewirte. Als gayns Danggscheen findet dir uff **dr letschte Syte e Guetschyn** zem abschniide. S Feschtgland isch im Ruom 3-Rose, St. Johann und Voltahalle. Lueget denn aifach in dr Zyttig, wo genau das isch.

Mir winsche Eych bis dört aane e tolli Zyt und viil Spass am Schnapplüftli.

Bis hoffendlig bald!

Roger



„Im Schutte gänn si uns efang uff d Gugge, drfir löön sich die dr Böögg lo mugge!“ Das isch Suschéé 2007 gsii. Die glyychi Idee kunnt vom Ruthli und vom Marco. Dr Böög im Zentrum vom Sujet het denn au optisch alles yberraggt. E imposante Schneemaa uf em Schliiterhuffe het unser Requisit ziert.



E guet gluunts Grüppli im Bruune Mutz bim Apéro vor em Mändigs-Cortège: E Räuber (mit Gnaagi) und drey Schugger.

Versteggt, unter Huet und Mantel: Die lingge Veegel und mit Helm und Uniform, d Basler Bobbys.





Jä was jetzt? Räuber oder Rabbi?



E Schugger-Mysli  
bim Versuech e  
Auschtere z siirpfe  
in dr drey Keenigs  
Bar. Nai, das isch  
glaub nyt fyr  
d Claudia!

Unsere Major,  
dr Werni mit zwai  
wytttere „alle Dante“.  
Links, unseri  
Schnyydere, d  
Brigitte und rächts  
drvoos, s Anni, ihri  
flissigi Hilf.

Dr Böög. Die wyssi Hülle  
het dr Mull zämme mit dr  
Sandra ybrigens emol als  
Gägg baschtled. Är het  
das emol amme Aaloss  
akaa .....  
OK - so usgfüllt isches  
denn nit gsüü!



Dr Roll, genannt „Logge“  
(e ehemoolige  
Schiineblooser-Waggis)  
in Hochform mit em  
Obmaa.

Und no ain in  
Hochform: dr Fix  
umringt vo zwai  
Blondine. Rächts e  
„Gascht“ us  
Lausanne:  
d Cindy, Tochter  
vo dr Jacqueline.





E baar Schnappschüss vom Zyschtig an dr „Kinderfaasnacht“: Jo, die meischte Binggis vo de Luftschnapperli passe halt nümms ins Laiter-Wäägeli .....

Unde lings: d Beatrice und dr Benno Kund; wie allewyl mit Goschdym drby.





Und im Baggestoos  
„war die Hölle  
los!“.Schwoobe-  
Liedli und Party-  
Sause, wie in Kölle  
oder Mainz. „Die  
Hände zum  
Himmel ...“ Fyr e  
Stündli oder zwai  
isches jo OK ....

Bild unde. Au e neyi  
Fasnachts-Kultur:  
Die toll dekorierti  
Durnhalle bim  
Theater. Do hesch uf  
Sicher immer Platz  
kaa ...

Und wenn de wotsch  
richtig Schrübli uuseloo –  
zem Bischbyyl fyr  
Auschtere oder e  
fuffzääfränggige Tschinn-  
Tonic – denn muesch in  
dr Saal vom neye Drey  
Keenig goo.  
Schiss-Muusig bekunsch  
ybrigens graatis drzue ...  
Toll gseets aber allewyy!  
us!







Wär unsere Zeedel  
(Täggscht vom Marco)  
nonig gläase het,  
ka das jetzt no  
nochehoole.

## Im Schutte gänn si uns efang uff d Gugge, drfir löön sich «DIE» dr Böögg lo mugge

S isch jo e Klischéé, wo me nid mecht uff lo lääbe,  
aber exgyysi Zircher, s isch jo scho e bitz drnääbe!

Mir wänn nid spote, aber d Faggte diens klar beleege,  
bi uns ka sich sogaar d Frau Faasnacht no frei beweeye.

Us dr Not, wobby mir Bebbl findes jo scho zem lache,  
leene mir «dääne» Bobbies, wo das Dayl dien bewache.

Esoo sträng bewacht und kontrolliert vo Ort zue Ort,  
s gseet jo fascht scho uss wie ne Castor-Transport.

Die lingge Veegel mien e Droot ha zue de Wätterfrösch,  
das erklärt, dass si eme Schneemaa göön an d Wösch.

Diebstaal vo Gaischtigem Aigedum finde mir ganz übel,  
z Züüri filtze si dr Böögg und im Joggelipargg dr Küübel.

Apropos Gaischtig, hämmer scho gnuag vo däne Niete,  
Gigi say dangg, mien mir jetzt nid au no dr Cabanas hiete.

In letscher Zytt het «DIE» glaub sowiso dr Deifel gritte,  
mit däm Kompetenzcenter hänn si sich jo aber gschnitte.

Iberhaupt maine sii jo, si sygge d Schwizer Siibe-Sieche,  
im IQ-Verglych sinn mir denn Basel und si sinn Rieche.

Soo gnuag mit Verglych und Schluss mit däm Gfaasel,  
blyybed dir bitte z Ziiri & mir mache Faasnacht z Basel.

d Luftschnapperli Faasnacht 2007



Am Mittwoch  
bim obligate  
Halt am  
Wettstai-Platz.  
Guet hets dört e  
Müürli.



Am Samschtig vor dr  
Faasnacht isch die zwaite  
„Faasnachts-Yyschällete“ im  
Luftschnapperli-Käller yber  
d Büüni gange. Dr OK-Scheff,  
dr Mull, het au dasmol widder  
tolli Attraggtione organisiert.  
Gönner, Fründe und die  
musikaalische Gescht hänn  
total dr Plausch kaa!



Wie letscht Joor, sinn au das mol  
„Die Grob-schlächtige“ mit ihrem Poulet-  
Orgeli vorbyy koo. „D Schnitzelköch“ und  
„dr Mustafa“ (rächts), sinn s erscht mol drbyy  
gsii. Alli drey Bängg hänn e super Ufftritt  
aaneglet. Mir hoffe, dass si au näggscht Joor  
widder Zyt hänn, an dr Solothurnerstroos  
vorbyy zkoo. Mir würde uns risig freye!





Wär hät dänggt, dass mir bi  
uns Platz hänn:  
„D Krach-Schnygge“ hänn  
unsere glaine Käller fascht  
zem platze und zem beebe  
brocht!

Wo denn d Schlaager-Paraade  
ab CD losgange isch, hets kei  
Heebe me gää: bim Lied  
„Komm hool das Lasso raus...“  
(isch glaub öbbe 15 mol  
glöffel!), hänn alli  
begaischtered mitgmacht und  
mitgsunge!





**Dasmool het ys e aggtive  
Fasnächtler us Aesch  
(Löhrenagger-Hagger) Anworte  
gää. Dr Däni isch e Gönner by  
uns syt dr erschte  
Luftschnapperli-Stund!**

Name	Daniel Müller
Alter	43
Zivilstand	gschiide
Kinder	glaub kaini!
Bruef	Leer als Schryyner und Inne-Ussbau-Zaichner

**Wie würd e Wärbeslogan iber di lutte?**  
„Pflegeleicht und abwaschbar.“

**Drey positivi Aigeschafte vo dir?**  
Zueverläässig / pünktligg / ordentligg

**Was kritisiersch an dir sälber?**  
Daylwyys zue ungeduldig und bi laider au  
nid esoo spontaan.

**Was sinn dini Hobbys?**  
Fuessball, Bike (Velo), e woeneli Fitness  
und Faasnacht.

**Was hesch welle wärde, wo de ebbe 10  
gsi bisch?**  
Denn hanni mir no kaini Gedangge gmacht.

**Mit was hesch als Kind am liebschte  
gspiilt?**  
Mit dr Balle nadyrligg.

**Hesch e Laschter? Und welles?**  
Bi e bitzell pingeligg ... und ka nid ufhööre  
schutte, obwool ych das scho lang sött.

**Was wäär di Draum vom Abentüür?**  
Do fallt mr grad nyt yy.

**Was issisch, dringgsch am liebschte?**  
Fänchel mit viil Kääs und Domate  
iberbagge (kocht vo minere Mamma) drzue  
e Haggbroote. Bier, Cola-Light, amigs e  
guets Glas Wyy und ... in Calpe: Sangria.

**Wo hesch dini letschte Ferie verbrocht?**  
In de USA (Kalifornie).

**Lääsisch grad e Buech?**  
Bi nid so ne Buech-Lääser und wenn, denn  
lääsi e Biography.



**Iber was fir Glaynigkaite kasch di ergere?**  
Wenn am Samschtig Morge d BaZ noonig  
im Briefkaschte isch!

**Du dörftisch e neys Gsetz kreiere –  
welles wäär das?**  
Kaini Parggbuesse me, usser uff de  
Behinderte-Parggblätz.

**Iber welli Glaynigkeit hesch di kirzligg  
gfreyt?**  
Iber e härzliggs Danggscheen, nochdäm  
ych ebberem e Gfalle gmacht ha.

**In was wärsch gääm e Superstar?**  
Hit niene. Friener halt scho im Fuessball.

**Welli drey Sache würdsch uff e ainsaami  
Insle mitnääd?**  
D Adilette oder Flip-Flops, e Natel wo nit  
muesch uflaade und die neyschti Uusgoob  
vom „Kicker“.

**Wenn dr Arzt würd saage, du hesch nur  
no 24 Stund z lääbe, was machsch?**  
Mit mine beschte Frinde und dr Familie e  
Fescht mache.

**E gueti Fee schänggt dir spontaan  
Fr. 25'000.- zem «verbutze». Was  
machsch drmit?**

Lueg oobe. Und wenn no ebbs ibrig wäär,  
würd ych s uff d Sytte leege.

**Was findisch an dr Schwyz oder an  
de Schwyzer nid esoo toll?**  
Die ville Stüüre, wo mir mien zaale.

**Wo usser dr Schwyz, kennscht dr au no  
vorstelle z lääbe?**  
Aigendlig niene, usser villicht in Münche :-)

**Drey Gedangge zer Faasnacht?**  
D Löhrenagger-Hagger, nadyrligg d  
Luftschnapperli... und Alka-Seltzer.

Do e Usaal vo  
scheene alte  
Bilder, vo dr  
Basler Altstadt.  
Dört, wos aifach  
herrig isch zem  
gässle:  
Gämsbärg,  
Heubärg und  
Spalebärg.  
Entstande sin  
die historische  
Uffnaame  
zwüsche 1861  
und 1880.



Schönbauer / Basler Stadt

54



Basler Altstadt / Waisenhaus - 1861 / W. Schönbauer





**Mir wirte und feschte, am liebschte und  
am beschte, zämme mit euch!**

## **Nordtangänte-Fesch**

**Wo? Ruum Dreyroosebrugg, Voltahalle  
und St. Johann (dört ummenand).**

**Frytig bis Sunntig,  
8. bis 10. Juni 2007**



**Kemmet alli  
vorbyy!**

**Guetschyy n uf dr  
folgende Sytte  
unde rächts.  
Usschnyyde und  
mitbringe!**



### **Faasnachts-Termin:**

11. bis 13. Februar 2008  
2. Meerz Bummel

### **E spezielle Dangg an**

**Alli Gönner wo uns immer widder ...**

... mit eme **Batze** (näbscht em  
Byytraag) e riise Freyd mache. Sygs e  
scheens Dringgäld in unserem Käller  
oder mit eme Obolus amme Ständeli  
oder aifach eso!

Oder uns an dr Faasnacht **e Zvieri**  
vorbyy bringe. Oder fyr dr **Parkplatz** im  
Staineparking während dr Faasnacht  
fyr unser Requisit.


Oder uns **Material** zer Verfielig stelle,  
oder **was au immer!** Mir dange eych!

### **Mir gratuliere ...**

nochträäglic nonemol an däre Stell.  
Isch do vergässe gange. Mir sinn zwar  
dört gsii und hänn e Ständeli pfyffe:  
**Vreni Deola** (s Memmele vo dr Sändi)  
isch 60ig worde.

*Sött an däre Stell öbber vergässe gange sii, mecht sich dr Schriiberling bi dääne Persoone  
entschuldige. Mängmool kemme halt nit alli Informazzione zue syne Oore.*

Gäll, du kennsch  
mi scho?



**O'KK**

Öffentliche Krankenkassen  
Schweiz

**Jung und unkompliziert.**